

利津縣志卷第六

政略

郡縣既置以來守令賢者概列之循吏傳似列傳之體亦可施於名宦矣然名宦并鄉賢之首義有統屬而與同載筆之例可乎哉永清周志叙名宦曰政略謂古者有經無緯之書大抵名之以略取略之體以誌政蹟自政而外皆不具書所以表甘棠之愛也夫龔黃鄭白仰之者仰其治績而止耳節繁存略其誰曰不宜元高謙亨字益之直隸深州人由省舉至元間任縣尹奉法謹門無私謁三年政成俗變鼎建文廟簡俊秀充弟子員講學考藝利津學校之興實自此始

知縣林海霖本縣仁義鄉人洪武中由人材任清約慈惠政善民安事未詳

利津縣志 政略

一 卷六

明教諭李思道邑人洪武間由人材任行篤學純威儀嚴重人稱其師範

知縣姚志寧字孟安蒲州人永樂初由進士任治事平允奉法不阿吏民畏服事無可考

知縣陳泰河南睢州人永樂中由進士任廉明仁恕振士風革弊蠹民庶懷之

教諭司馬符會稽人舉人永樂間任有學行動於訓諭士夫重之訓導吳恭洛陽人字敬叔永樂間由儒士任勤啟迪日坐齋改諸生課歷九載雖祁寒酷暑無倦容

知縣畢忠字庭臣固安人正統中由舉人任以廉能稱盡心撫字調河南臨漳縣比去百姓哭之如失怙恃

訓導曹建仁和人天順中由歲貢任歲凶見有菜色者輒蠲俸爲

粥給之

教諭陳仲成字克修河南裕州人舉人成化間任以經學迪多士立條約以身先之一時士類篤勵學行仲成之力爲多

知縣陶福字天祿浙江臨海人舉人成化間任有治才興學校舉廢墜勸農桑增隄防凡有裨士民者必爲之比去頌不絕於人口知縣楊儉字節夫河南儀封人舉人宏治間任篤實績密有廉名惠民勸士裁決稱明允海口商舶往來稽察惟嚴無所染指以疾致仕民庶遮道泣留之

教諭趙鏗浙江臨海人宏治六年董教事行履方嚴邃於經學勤引翼以作士氣尋擢知懷寧縣

縣丞魏彥昭容城人進士初爲監察御史正德間謫利津丞時流賊劉七縱橫趙魏間其勢寔偏彥昭以津城卑淺日夜趣壯丁增

利津縣志

政略

一一

卷六

高浚深戒民儲戎器爲守禦計眾皆竊笑以賊所過無堅城修之何爲彥昭聞之益督巡不怠如是者年餘一日賊騎千餘至河東無船渡眾不以爲虞彥昭獨憂之會夜大風河凍冰堅賊遂渡河逼城彥昭乃屬僚吏集境內豪俊分地而守並遣使請援鄰境徙城外積粟於城內不令爲賊資復選輕騎數十使疾馳城下爲疑兵無何賊至軍於西北郊彥昭分其眾爲數隊迭出擊之自晨及晡賊眾引去城乃獲安祀名宦

訓導董濬江西樂安人貢生正德七年任日與諸生窮究聖賢工夫體認良知宗旨不受及門脩脯貧士有不克婚葬者伙助之士習學術爲之不振

知縣李寶直隸武清人吏員明於鞫訟歷任九年庶務畢舉爲民所推

知縣楊啟芳字汝含直隸寶應人舉人嘉靖二十九年任廉明能幹事完逋負鋤豪強卹民瘼作士氣毀淫祠以其材修學校歷五載而去民爲立石誌美

教諭徐滋浙江臨海人貢士嘉靖三十年任雅有風範敷教詳明當時咸望丰采焉

知縣賈光大字實甫河南杞縣人舉人隆慶五年任均田有功津民懷之事見祠堂記

知縣馮執中廣東恩平縣人萬曆二十六年由舉人任屬歲饑執中蠲俸施粥散金錢以賑貧民創置學田三十餘畝爲贍諸生之資輯邑志七卷今已無存

知縣周日強北直蠡縣人舉人萬曆末年尹茲邑廉察能斷務節用而愛人稽冊籍以正飛詭均賦役以甦里甲惠政不可悉數邑

利津縣志

政略

三

卷六

素乏科第日強設爲聚星會一月三試厚供饌勤督課與教諭熊喆第其甲乙自是科目接踵比陞去士民懷思建祠時祀

知縣韓景星北直長垣人貢生崇正間知縣事慈祥平易爲政寬猛互劑不煩而理禮士夫崇學校有循吏之稱擢永甯州牧

縣丞王國昌字春宇永平府昌黎縣人崇正末年任居官清儉喪亂之後倉米尚餘數百石毫無所利悉以賑難民還鄉者全活甚眾又借築城池夫匠日給二升以備防禦至今民頌其惠

志曰古今善政多矣究其要歸不過曰仁其民以養以教而已糾猛濟寬雖亦稱乎遺愛然御之良者無藉於鞭策治之善者不資於察斷此愷悌之稱所以必推循良也高公之肇起學校畢公之深得民心陶公之舉廢興靡與夫其他諸公皆有聲績可述若夫蒞事不煩雅有惠愛則林公韓公有焉學師自司馬公以下皆能

盡職董公闡良知之旨學本姚江雖戾於朱子然講求實詣不  
愈於章句之爲耶魏公力保危城厥功蓋偉顧其官僅一丞耳丞  
之無所施用昌黎嘗具道之若魏公者真不負丞矣且丞而賢於  
令矣

知縣許養高遼東衛人順治初年任時亂初平艱生計養高下車  
以拊循爲務會奉文清丈地畝照墾熟編額乃爲民申請從濱州  
例得熟地三分之二視昔徭賦三分減一不二年而民日殷庶居  
官廉而平嚴而不苛民畏威懷德立祠祀之厯陞冀南道副使  
知縣陸經字復古浙江鄞縣人以進士來爲令時屢荒之後力行  
招撫給以牛種寬其賦稅民獲復業先是值年里書以役督押每  
多需索其公務雜費由里甲應付乃悉革之臨德倉米向皆報車  
夫運送至是官收官解民免領解之苦四鄉各設義倉設義學訓  
民子弟每有訟獄隨到隨審興學校集才俊異等者試之優以隆  
禮會考績稱最大府

題陞邑人士咸思借留云

知縣黃章字恕涵浙江錢塘人官生康熙十六年任利津瀕海疲  
邑民困雜輸章下車後悉除之按糧均役減羨去耗一切起解車  
腳之費俱蠲資代賠邑故多隱漏荒田章奉文清覈倍足常額復  
請輕徭薄賦民始不病又鼎建學宮四鄉置義學月給以資士之  
貧者歲終周以錢粟俠少者流喜鬪健訟名爲市虎章至即皆屏  
息連年屢饑章自糴穀八十餘石倡紳富共捐助穀爲粥以賑春  
耕之時課農桑或乏牛種蠲金貸之秋後不能償者即焚其券歲  
己未

詔郡縣積穀備荒章建義倉四捐穀九十餘石復倡紳士捐穀一百五

十餘石時值藝麥貧無種者即以穀貸之麥收還倉以備秋時貸借他如修縣署復養院創營廨修城隍等廟不可殫述任四年擢膠州牧去民爲立碑以誌去思

知縣許士貞河南人康熙三十六年由舉人任勸農課士省刑薄歛躬節儉以身化民三十六年以艱歸論者稱爲良吏

教諭耿願愚字又柴東昌館陶人康熙十九年以憂去後復補原官馭士子嚴而有恩刊士箴八條以訓文武諸生其大旨皆原本忠孝爲明體達用之學月課必以經術史漢古文大家爲程式分俸資膏火士風丕變諸生多連擢甲科者奉檄賑饑民監放米石皆有條理在官資用不足取於其家乙酉陞靖海衛教授去

知縣許起昆江南歙縣人優貢雍正八年任課士如嚴師愛民如慈母會邑大永起昆詳請成災賑數千石官穀復捐賑千餘金去

利津縣志

政略

五

卷六

任期年復來尋即真歲又饑捐賑如前以勞動卒於官士民皆巷哭祭者塞途邑中稱前後二許云

縣丞宜兆公正白旗人蔭生雍正十年衽惠民恤商不受餽不私稅操履始終一致陞文登知縣

知縣毛邑貴州平越人雍正十一年由進士任敏斷有爲凡諸利弊興除殆盡德米例收黃邑請改爲黃白兼收嗣又請折色而已調繁章邱惜未得竟其澤云

知縣楊甘雨江西新建人進士乾隆四年任倡修學宮捐設義學考課皆有常規

知縣宮懋讓江南泰州人副貢乾隆十年任以廉幹稱遇大旱宿於廟憂不食頃之得大雨值歲荒不忍敲撲罄囊墊解款以紓民力任末期調壽張去日祖餞遮留者相望於道

朱容極湖北漢陽人舉人乾隆十二年河溢壞田禾民居容極踏  
勘詳請成重災民困以蘇旋調鉅野去舊志云爾按勘詳成災恒  
有之事豈誌政蹟者或有  
遺漏耶  
姑存之

知縣劉文確湖南辰谿人以拔貢令茲邑歷十年稱良吏築堤防  
疏溝洫捕蝗蝻賑災傷民食其德海水溢良田變斥鹵民悉苦之  
文確籲請豁免大糧地一百二頃有奇斷庶獄每以一言立辨有  
請託者嚴拒之又蠲俸修文昌閣建義學修邑志一冊以艱去邑  
人爲立去思碑

教諭劉永福東平人由拔貢任和氣藹然稱有師範中癸卯科舉  
人歷陞知直隸三河縣

教諭黃克中即墨人癸卯舉人訓士時課以文門多科舉俸滿題  
陞知縣俄以艱歸

利津縣志

政略

六

卷六

教諭李廷弼海陽人由舉人任爲人醅謹勤以教士以德行先陞  
江西貴溪知縣

知縣程士範字作模陝西渭南人乾隆二十四年由進士任興學  
重農時有修建津城東南當河流之衝難禦盛漲乃建石壩四十  
餘丈民到今賴之他如纂縣志葺城垣豁荒糧數千兩埋溺屍數  
千人皆有可稱崇祀賢尹堂

知縣高廷魁順天大興人嘉慶十年由庶常任有爲有守興學校  
飭倫紀以儒術飾吏治以疾去

知縣蔣超曾字軼驤江蘇吳縣人嘉慶二十二年由庶常來爲令  
戊寅海水溢查被災戶口發粟散財不授權胥吏己卯九月黃水  
漫入清河洪波汜濫超曾按村救災舟行數旬始反借廉三千兩  
於附城一帶修長堤數里兩岸自礮李莊至蟬螭嘴俱築土堰水

既退復建涵洞於石壩南以便啟閉迄今民念其功祀賢尹堂以報之

教諭王餘枚字个臣福山人嘉慶二十四年由舉人大挑知縣改就教諭其學以心得實踐爲宗爲善恒若不及眾以爲得師卻餽遺捐廉修祭器及庫又獨修明倫堂力返士行不許生監赴縣控愬道光元年以上官意被劾去生徒多負書笈從之者

知縣普恒字月樓滿洲正黃旗人道光十年由舉人任廉惠並著故事錢漕不敷解額計惟增數以免墊賠恒曰吾爲民父母墊賠亦分耳忍自爲謀而使闔邑受無窮之累乎遂不議增漕米解青州供兵精官收官解不藉民力數十年宿弊剗革殆盡而恒之負累由此深矣去任後囊橐如洗及歿邑人祠之賢尹堂

知縣倪夢麟順天人原籍浙江蕭山道光二十六年由進士任興

利祛害尤汲汲於文教修文廟勤試諸生又捐廉數百金製號具至今稱便邑人爲立嘉惠士林扁額

知縣姜賡元字橘生浙江歸安人咸豐四年由監生授按經歷代理縣事安良除暴民間疾苦尤切訪咨會粵匪竄踞連鎮邑人集團練賡元時閱其伍厚獎賚比閭恃以無恐決獄無壅滯無辜株連者釋不問乙卯夏蝗捐貲立局盡捕之是秋淫雨黃水漲溢堤埝十潰其九賡元躬率搶修不舍晝夜築護莊堤不就憤欲投河眾號泣持之乃擲冠於河決口始塞積勞感風由是病不起方病綿惓猶肫肫以民命爲念所勘災計八成以上亟請賑恤遂卒士民祀之

志曰許陸黃三公當凋敝凶荒之後休養爲亟而陸黃兩公日在控惚顧猶多所修建何其力之綽爾有餘也前後二許之稱故非

虛譽毛公之累有興除宮公之代民墊歛劉公之竭心教養謂邑  
父母茲其選歟程公蔣公肇修長堤禦黃水決嚙功垂無既高公  
儒吏蓋操本以化民者普公病已利民清矣姜公以死勤事其崇  
祀也不其宜哉教諭若耿若李若王以實學教人無愧儒者師其  
餘政皆可書姑弗論云

政略補遺

知縣王宏字允高武涉人宏治九年由舉人任刑法得中民思其  
惠遷安慶府通判

知縣李應甲字鳳山廣東潮陽人康熙十一年由進士任釐剔撫  
字政治稱平學校公堂皆所繕治居三年民頌之擢內閣中書舍  
人

教諭孔毓炳曲阜人乾隆二十三年由拔貢任好養人才課士校  
文無虛日月蒞任未幾而學者爭相磨勵餘未詳